

## **Incumbensa Rettich concernent la quantificaziun dal grad da qualificaziun da las personas ch'entran en il mund da lavur**

L'avust 2020 ha la Regenza menziunà che la part da las personas giuvnas creschidas ch'entran senza emprima scolaziun en il mund da lavur en il chantun Grischun na saja betg enconuschenta. Perquai che questa basa da fatgs manca, n'èsi betg pussaivel da prevair cun tschertezza il svilup dal dumber da personas ch'emprovan d'entrar senza scolaziun en il mund da lavur. En sia risposta a mia dumonda «concernent la mancanza d'ina emprima scolaziun sco factur da ristga» menziunescha la Regenza che la mancanza d'ina emprima scolaziun possa periclitar l'existenza e che la ristga d'arrivar en povradad s'augmentia. Er las consequenzas negativas per la sanadad e pia l'augment dals custs da sanadad vegnan menziunads da la Regenza. Gist a quellas personas cun ina carriera negativa da scola, da scolaziun e da professiun smanatscha pli savens la via en l'agid social.

Sin basa da studis naziunals importa la quota da personas giuvnas creschidas ch'emprovan d'entrar senza emprendissadi u senza scola da cuntinuaziun en la vita professiunala, fin 10 %. Sch'ins trasferescha questa cifra sin il chantun Grischun, ston ins far quint per onn – stimà en moda conservativa – medemamain cun 80 fin 100 personas giuvnas creschidas che han quest destin. Ni ord perspectiva sociala ni ord perspectiva sanitaria u economica n'è quest stadi acceptabel.

Per pudair agir cun cleras finamiras en il sector da la mancanza d'emprimas scolaziuns ston ins evitar da far acziuns malponderadas. In fatg essenzial è quel da stgaffir l'emprim ina basa da fatgs solida. Cun agid da questa basa pon vegnir eruids eventuels hotspots u er connexs, e là nua che quai è necessari, poi vegnir reagì cun mesiras efficacias.

Per quest motiv pretendan las sutsegnadras ed ils sutsegnaders che la Regenza quantifitgeschia en il futur il grad da qualificaziun da las personas giuvnas creschidas ch'entran da nov en il mund da lavur.

Tavau, ils 18 da favrer 2021

**Rettich**, Schneider, Bettinaglio, Atanes, Brandenburger, Cahenzli-Philipp, Caviezel (Cuir), Deplazes (Rabius), Derungs, Favre Accola, Gartmann-Albin, Geisseler, Hartmann-Conrad, Holzinger-Loretz, Horrer, Müller (Favugn), Pajic, Papa, Perl, Preisig, Ruckstuhl, Rutishauser, Schwärzel, Tanner, Thomann-Frank, Thür-Suter, von Ballmoos, Widmer (Favugn), Zanetti (Landquart), Collenberg, Spadarotto, Tomaschett (Cuir)